

陽
春
白
雪

陽春白雪第七卷目錄

憶舊游慢

霓裳中

梅花引四

玲瓏四犯二

洞仙歌

念奴嬌

滿庭芳

聲聲慢二

齊天樂三

賀新郎二

過秦樓二

徵招

鳴梭

解連環

瑞鶴仙 三

疎影

翻香令

摘紅英

夢江南

秋蕊香令

夜行船

虞美人

鬬鷄回

踏沙行 二

鷓鴣天 三

謁金門 六

菩薩蠻 五

訴衷情

阮郎歸 二

畫堂春

南鄉子

朝中措

青門怨

少年游

柳梢青

更漏子 二

少年游

採桑子

一叢花令

江城子令

漁家傲 二

眼兒嬌

霜天曉角 五

陽春白雪卷第七

臨濮趙聞禮立之選

憶舊游慢
趙虛齋

賦東湖荷花再用方時父韵

望紅蕖影裏冉冉斜陽十里隄平喚起江湖夢向沙
鷗住處細說前盟水鄉六月無暑寒玉散清冰笑老
去心情也將醉眼鎮為花青
亭亭步明鏡似月浸
華清人在秋庭照夜銀河落想粉香濕露恩澤初承
十洲綵縹何許風引綵舟行尚憶得西施餘情裊裊
烟水汀

霓裳中序第一

木利咏

伊梅津

青颦粲素靨海國人偏耐熱餐盡風香露屑便萬里
凌空肯憑蓮葉盈盈步月悄似憐輕去瑤闕人何在
憶渠癡小點點愛輕拋愁絕舊遊輕別忍重看瑣
香金篴淒涼清夜簾席杳杳詩魂真化風蝶冷香清
到骨夢十里梅花霽雪歸來也厭厭心事自共素娥
說

花心動

得於江西歌者
而不知名氏

粉蝶雲齊度清茄愁入暮烟林杪素艷透春玉骨淒
涼勾帶月痕生早江天莽蒼黃昏後依然是粉寒香

瘦動追感西園嫩約夜深人悄
記得東風窈窕曾
夜踏橫斜醉携嬌小惆悵舊歡回首俱非忍看綠牋
紅豆香銷紙帳人孤寢相思恨花還知否夢回處霜
飛翠樓已曉

江城梅花引

比世傳本差異
而不知名氏

娟娟霜月冷侵門怕黃昏早黃昏手撚梅花無語對
芳尊酒又不禁愁未醒斷魂遠一更更斷魂斷
魂斷魂空斷魂被兒裏香半溫睡也睡也睡不穩誰
與溫存惟有窓前殘燭照啼痕深夜不眠聽畫角人
瘦也比梅花瘦幾分

又

使北時和
李漢老

洪忠宣公

去年湖上雪欺梅月飛來片雲開雪月光中無處認
樓臺今歲梅開依舊雪人如月對花口還有誰一
枝兩枝三四蕊想西湖今帝里綵牋爛綺孤山外目
斷雲飛坐久花寒香露濕人衣誰作叫雲橫短玉三
弄傲對東風和淚吹

又

無名氏

對花時節不曾收見花殘任花殘小約簾櫳一面受
春寒題破玉牋雙喜鵲香燼冷遠銀屏渾是山待
眠未眠事萬千也問天也恨天髻兒半偏繡裙兒寬

了還寬自取紅氍重坐暖金船惟有月知君去處今
夜月照秦樓第幾間

又

趙憇菴

單口寒引畫龍聲雨初晴月微明竹外溪邊低見一
枝橫澹月踈花三四點春尚淺早相看似有情夜
永袖冷暗香凝恨半銷酒半醒靚粧照影未忺整雪
艷冰清只恐不禁愁絕易飄零待得南樓三弄徹君
試看比從前更瘦生

蘭陵王

陳抑齋

角聲切何處梅梢弄雪還鄉夢玉井樓前千朶笑萼

棹空碧隣翁問消息為說紅塵倦客應憐笑弓劍旌
旗底事留人未歸得 淮山舊相識記急處笙歌靜
裏鋒鏑隋堤楊柳猶春色嗟十載人事幾番碁局青
油年少已鬢白漫惆悵京國 朱墨困無力似病鶴
樊籠老驥羈勒夕陽不繫棲林翼侍添竹東園種松
西陌功名休問吾老矣付俊傑

又 和清真

葉漁村 士則

大堤直嫋嫋游雲蘸碧蘭舟上曾記那回拂粉塗黃
弄春色施顰託傾國金縷尊前勸客陽臺路烟樹萬
重空有相思寄魚尺 飄零歎萍跡自懶展羅衾羞

對瑤席折釵分鏡盟難食者桃葉迎笑柳枝垂結萋
萋芳草暗水驛斷腸盡闌北寒惻淚痕積想柱鴈
塵侵籠羽聲寂天涯流水情何極悲沈約寬帶馬融
怨笛那堪燈幌聽夜雨鎮暗滴

又賦胡伯雨別業

劉賓王

此何夕天水空明一碧商量賦如此江山幾箇斜陽
了今昔荒臺步晚色沙鳥依稀曾識啼鶻外人遠未
歸江濶晴虹卧千尺殘碑蘚痕積記當日清游夫
君題墨碧瑤仙去蒼雲隔飛一鏡秋冷列屏天遠鷄
聲人語半郊邑寄情又江國愁寂怕聞笛正怨苦

溪猿飛倦汀翼陰陰翡翠迷津驛慨世事塵化吾心
形役清吟孤往渺醉影夜翠濕

玲瓏四犯

重過南樓用
白石體賦

譚在菴

宣子
明之

碧黯塞榆黃銷堤柳危闌誰料重換才情猶未減指
點驚如許當時共伊口願為辭家怕吟鸚鵡衮衮波
光悠悠雲氣陶寫幾今古生塵每憐微步渺江空
歲晚知在何處土花封玉樹恨極山陽賦吹簫扇底
餘歡斷怎忘得陰移庭午離別苦那堪聽敲窓凍雨

又

劉葯房

之才
賓王

幾疊雲山隔不斷闌干天外凝眺秋與愁并梧暹雨

痕先表嬌夢半握芙蓉奈曲曲翠屏深窈問愁根當年誰種漠漠淡烟衰草鴛鴦懶拂蘋花影記眉嫵
縈情多少蟾轡玉虎牽絲轉聽盡秋缸曉真誰念卧
雲衣冷香壓金蟾小寫新詞先寄江鴻歸去且教知
道

水調歌頭

利碧澗 登

日月換飛澗風雨老孤松千巖萬壑秋重白氣接長
空一笑掀髯徐起蒼珮腰間相照猶自湧晴虹桑海
幾番覆人尚醉春風橫白石結綠綺送飛鴻十年
夢事消歌長劍吼青龍却笑人間多事一殼蜎涎光

景顛倒死英雄雲日空濛裏玉鶴任西東

洞仙歌

全前

弄香吹粉記前回酒困綠露沉沉轉花影翠簾深隱
隱紅霧依人荷月靜新樣雙鸞交映如今誰念省
短雨長雲曾託琵琶再三問最苦綠屏孤夜久星寒
無處頓風流心性又莫是偷香寄韓郎到漏泄春風
一枝花信

揚州慢

和趙虛齋瓊花

鄭覺齋

弄玉輕盈飛瓊淡埽襪塵步下迷樓試新粧繞了炷
沉水香球記曉剪春冰馳送金瓶露濕綈騎星流甚

天中絕色被風吹夢南州
尊前相見似羞人蹤跡
萍浮問弄雪攀枝無雙亭上何日重游我欲纏腰騎
鶴烟霄依舊事悠悠但憑闌無語烟花三月春愁

念奴嬌

全前

捲簾酒醒怕無言慵理殘粧啼粉記綰同心雙繡帶
珠箔青樓花滿琢玉傳情斷金訂約總是愁根本誰
知薄倖肯於長處尋短舊日掌上芙蓉新來成刺
變却風流眼自信華年風度在未怕香紅春晚恩不
相酬怨難重合往事冰澌泮分明訣絕股釵還我一
半

洞仙歌

胡蒙泉

半欄花雨是夜來
凭處夢過溪橋逢柳住
亂鶯聲殘酒醒正是
關情山枕上吟就回紋錦句
歸鴻應別浦綠漲瀟茫
早近湖陰喚船路
覽芳菲歌窈窕獨立
莎根剩一掬閑情淒楚
欲待折微馨寄相思又生
怕相思帶將春去

滿庭芳

全前

愁徹檐花吟枯硯
海日長多費茶烟懷芳心苦持此
過年年雨外飛紅何許應流到
米綠洲邊銷凝處別離情緒
正是海棠天吹花題葉事
如今夢裏記得

依然料歸來鶯居春後燕占人先誰念文園倦客琴
空在懶向人彈愁何極楚天老月偏是到窓前

驀山溪

劉菊房

醉魂離夢捻合難成片惡味怕黃昏更西風梧桐深
院蟬鬆翠嬾記那日相逢情繾綣語玲瓏人靜凌波
見香雲曾約念阻題紅怨應是綠窓寒也思郎雲
衣誰換郎今銷黯步楚竹江空雲縹緲水瀾茫不抵
相思半

又

史可堂

危欄看月番做聽秋雨一滴一聲愁似相伴離人悲

苦籠香袖冷獨立倚西風紅葉落菊花殘都是關情處
如何排遣賴有高陽侶長嘯酒壚邊且同賦秋娘詞
句山翁醉矣一笛小樓空思往事者孤雲目斷征鴻去

聲聲慢

五日

劉葯房

湘雲織玉楚葛篝香涼蘭簾幙風靜怨抑難招沈魄
當年獨醒莫唱江南古調念天涯深情誰省時暗換
最秦樓惆望歸期無定曾是榴裙誤寫怕照眼枝頭
絳綃花並巧篆盤絲午鏡綠窓闌影香蒲也應細剪
但年年斷雲愁冷迎醉面看銀蟾飛浴露升

又和陸景思黃木香

史可堂

羞朱妬粉染霧裁雲澹然蒼珮仙裳半額蜂粧莫道
梳洗家常碧羅亂縈小帶翠蛟寒一架春香清思苦
倚晴嬌無力如侍韓郎密幄籠芳吟夜任露沾輕
袖月轉空梁弱骨柔姿偏解勾引詩狂遺鈿碎金滿
地恨無情風送韶光閑晝永者青青垂蔓過牆

過秦樓

曾月朋
林子隆

曙色開晴輕颼散暖日影才經簷角倦來芳徑且倚
闌干觸地新愁粘著長日如年可堪恨雨絲絲夢雲
漠漠見鳴禽逆響乳鶯梳翅癡愁方覺凝望處初

綠呈新陳柯折舊忘了一春歸却不傷花老只怕花
開解使朱顏銷鑠寶扇輕搖亂拋花片教飛迎風低
掠忍重携素手驟覺一分瘦落

又

利碧澗

眉黛山分顰朱星合郁郁夜堂初見芙蓉寄隱豈
傳香便許翠鬟偷剪迎夜口羞欲晨先怯風流口口
未慣正流蘇帳掩綠玉屏深紅香自暖誰信道媚
口難留驚雲易散從此三橋路遠巢燕春歸剪花詞
在難寄紅題一片料想伊家如今羞傍琴窓慵題花
院但碧桃影下應對流紅自歎

齊天樂

全前

淡雲荒草秋汀莫歸心又寒烟水論檻移花量船載
酒寂寞當年情味孤蓮夜閉聽四壁松聲欲高還細
似近如遙露鴻聲亂楚天外藍橋人斷歲久舊家
曾共賞九華花事艷雪初融生香自暖消得金蓮帖
地相思破睡謾一點琴心暗闌千里愁怯潮生曉帆
風又起

又和翁時可悼秋娘

曹松山 達

翠簫聲斷青鸞翼心期口釵誰表夜燭銀屏春風粉
袖猶記琵琶斜抱瑤池路香恨巫女回雲月娥沉照

謾說蓬萊玉環花貌夢難到
巖花亭院乍冷更蛩吟風
碎鴻飛烟渺綠玉彈碁紅
牙按拍樂事歡情終少劉
郎未老要鬢翼堆玄腕酥
凝皓莫忘香口綠羅裙帶
草

又

柴秋堂望

淒淒楊柳瀟瀟雨情牕怎禁
滴瀝思裏傳螢愁邊落鴈
多少東吳山色知他恨極
料為我窓前強鳴刀尺竟
日西風那堪無寐更隣笛
黃花開偏未也花開應笑
我年少難覓潮上長安口
口渭水都把韶華暗擲何
人碎壁尚衰草連天暮烟
凝碧怕說相思撼楓

喧夜寂

徵招 梅

李草堂

翠壺浸雪明遙夜初疑玉虬飛動莫弄紫簫吹墮寒
瓊驚夢把紅爐對擁怕清魄不禁霜重愛護殷勤待
長留作道人香供 塵暗古南州風流遠誰尋故枝
么鳳謾舉目銷凝對愁雲睜瞞向霞扉月洞且嚼蕊
細開春蠶這奇絕好喚蒼髯與竹君來共

賀新郎 憶鶴

劉葯房

蒼蘚粘溪路悵山君儼然羽化夢口何許曾約秋雲
紫客袖舞傍吟臯硯塢嬌清唳裂穿雲宇江碧空濛

無處問問孤山梅底人知否烟夜永耿心語 瑤華
一去成幽阻倚脩篁抱琴愁絕天寒日莫城郭悲歌
華表恨此事銷凝千古有招隱小山能賦蕙帳空兮
誰夜怨算課騷讀易俱淒楚步深窈墮松露

賀新郎

袁宣卿

曉色明窓綺篆煙銷寒生翠幄烏啼人起昨夜西園
新雨過細草閑花似洗漾藍影柳塘春水晴晝雙飛
歸來燕正東風緩緩臨桃李還又是醉天氣 回廊
小院簾垂地恨連天芳草淒迷短長亭外愁到春來
依然在舊事還如夢裏又生怕人驚憔悴何處樓頭

吹羌笛向曲中說盡相思意三弄罷寸心醉

鳴梭自度

譚明之

織綃機上度鳴梭年光容易過
縈縈情緒似水烟山霧兩相和
謾道當時何事流盼動層波
巫影嵯峨翠屏牽薜蘿
不須微醉自顏酡如今難恁麼
燭花銷艷但替人垂淚滿銅荷
賦罷西城殘夢猶問夜如何
星耿斜河候蟲聲更多

解連環姑蘇懷古

奚秋厓

霽鬟新掠正風回浪影時
搖城脚歎天涯春草無倫
似凝竚當時柳顰花弱步錦珠沈謾一瞬千年如昨

信龍棲鳳閣無奈都由笑歌休却
斜陽柳邊自落
聽幽禽兩兩沙際停泊
道世間多少閑愁總輸與扁
舟五湖遊樂便買蓑衣又生怕魚龍風惡把從前萬
事對酒且休問著

瑞鶴仙

曹松山

爐烟銷篆碧對院落秋千盡
永人寂濃春透花骨正
長紅小白暈香塗色
銅駝巷陌想遊絲飛絮無力念
繡窓深鎖紅鸞虛度禁烟寒食
空憶象牀沈水鳳
枕屏山瑞歡尤惜粉香狼籍
海棠下東風急自秦臺
蕭咽漢皋珮冷斷雨零雲難覓
但杏梁雙燕歸來似

曾舊識

又

余樵隱

所義夫

怪新來瘦損對鏡臺霜華零亂鬢影胸中恨誰省正
關山寂寞莫天風景韶裏漸冷聽梧桐聲敲露井可
無人為向樓頭試問塞鴻音信爭忍勾引愁緒半
掩金鋪雨欺燈暈家僮困臥呼不應自高枕待催他
天際銀蟾飛上喚取嫦娥細問要乾坤表裏光輝照
予醉飲

又和丁基仲

得趣居士周氏

畫樓簾捲翠正柳約東風搖蕩春霽細桃雨才洗似

粧臨寶鏡脂凝鉛水雲偏髻子墜釵梁羞看燕壘最
堪憐錦繡香中早有片紅飄砌 閑記琴彈古詞曲
按清商舊年時事屏山盡裏江南信夢中寄感春濃
懷抱午醒初解淺酌依然又醉傍闌干猶怯餘寒倦
和袖倚

疎影 催梅

施芸隱 擬
知言

低枝亞實望翠陰護曉幽夢難覓淒楚霓裳漫闌瑤
臺經年暗鎖清逸春風似怪重門掩未許入玉堂吟
筆想壽陽却厭新粧倦抹粉花宮額 還記孤山舊
路未應便負了波冷蟾白莫寄相思惟有寒烟伴我

騷人閑寂東君須自憐疎影又何待山前雪積好試
敲□□聲催與約鼎羹消息

翻香令

鄔文伯

醉和春恨拍闌干寶香半炷倩誰翻丁寧告東風道
小樓空斜月杏花寒夢魂無夜不闌山江南千里
霎時間且留得鸞光在等歸時雙照淚痕乾

摘紅英

趙參晦

東風冽紅梅拆

食列

畫簾幾片飛來雪銀屏悄羅裙

小一點相思滿塘春草空愁切何年徹不歸也合
分明說長安道簫聲闌去時驄馬誰家繫了

夢江南

前人

簾不捲細雨熱櫻桃
數點霽霞天又晚
一痕涼月潤
初消風緊絮花高
閒處少磨盡少年豪
昨夢醉來騎白鹿
滿湖春水紋家橋
濯髮聽吹簫

秋蕊香令

黃乙山

花外數聲風定
烟際一痕月淨
水晶屏小
歌醉枕院
靜鳴蛩相應
香銷斜掩
青銅鏡背
燈影寒砧
夜半和鴈陣
秋在劉郎綠鬢

夜行船

黃野橋

十四弦聲猶未斷
星月上西牆
一半却手休彈
含情

微妬報道春宵短 銀燭紗籠須早辦 不住地金蕉
催勸別院人歸小 窓燈靜自把花枝看

虞美人

前人

捲簾人出身如燕 燭底粉粧明艷 羯鼓初催按六么
無限春嬌都上舞裙腰 畫堂深窈 親曾見宛轉楚
波如怨 小立花心 曲未終一把柳絲無力倚東風

鬬雞回

夾鍾商

杜龍沙

鶯啼人起花露真珠洒 白苧衫青驄馬繡陌相將鬪
雞寒食下 回廊暝色惜惜應是待歸來也 月漸高
門猶亞 悶別銀缸漏聲初入夜

踏莎行

前人

波暖芹汀風香蘭圃清塵幾點茸茸雨盡船絲竹載
梁州綵旗繩板歡游女脩禊初三禁烟百五年華
恰到風流處一生只許百回春一回春到休輕負

又

無名氏

殢酒情懷恨春時節柳絲卷陌黃昏月把君團扇卜
君來近牆撲得雙蝴蝶笑不成言喜還生怯顛狂
絕似前春雪夜寒無處著相思梨花一樹人如削

鷓鴣天

全前

題得相思字數行起來桐葉滿紗窓秋光欲雨暮聲

鴻粉帳口容花露香
新寂寞舊疎狂玉爐消息記
錢塘小閣立徧紅蕉樹一帶殘雲趁月黃

又

胡蒙泉

六曲銀屏夢隔雲半分鸞影匣生塵別來可是春愁
覺試著輕衫不貼身
風月夜短長亭也須聞得子
規聲歸時莫看花梢上但看芳洲綠口深

又

利碧澗

鳳尾鬟香再疊梳藕絲衫嫩感雙魚閑收未利熏藤
枕自揀芙蓉遶翠櫺
新浴後淺粧初衛夫人帖學
行書西牕一霎黃昏雨笑問新涼飲酒無

謁金門

杜龍沙

階露重。浥透尋花雙鳳。天色清明風不動。薄衫金絡縫。午枕高雲斜縱。一覺風流春夢起。看翻翻簾影。弄夕陽歸燕共。

又

李仲敏 好古

花過雨。又是一番紅。素燕子歸來愁不語。舊巢無覓處。誰在玉闌勞苦。誰在玉樓歌舞。若使塵吹得。去東風。候萬戶。

又

無名氏 趙參梅

羞說起。嚼破白桃花。蕊人在夕陽深巷裏。燕兒來也。

未一樣半紅半紫雙鳳同心結子分在郎邊郎不
記為郎今拆碎

又

陳雲厓

春晝永接葉鳴禽相應風定落紅香一逕踈踈窓竹
影寂寞年時酒病遠笛悠悠吹醒闌上層城天又
暝雲山青不盡

又

鄭覺齋

夜秋永葉葉梧桐霜冷皓月窺人深院靜孤鴻窗外
影情是相思深井思是相思脩綆別後信音渾不
定銀瓶何處引

又

李嶺洲

花似匝兩點翠娥愁壓人又不來春且恰誰留春一
霎消盡水沉金鴨寫盡杏牋紅蠟可奈薄情如此
點寄書渾不答

菩薩蠻

劉小山

去時滿地花陰月歸來落盡梧桐葉簾外小梅殘綠
窓幽夢寒明朝口玉勒又作江南客芳草偏長亭
東風吹恨生

又

許東溪

介三

西風又轉蘆花雪故人猶隔闕山月金鴈一聲悲玉

腮雙淚垂 繡衾寒不暖愁遠天無岸夜夜卜燈花
幾時郎到家

又

黃師憲 公度

高樓目斷南來翼玉人依舊無消息愁緒促眉端不
隨衣帶寬 萋萋天外草何處春歸早無語凭闌干
笙聲生暮寒

又

留積翁 元崇

江頭日落孤帆起歸心拍拍東流水山遠不知名為
誰迢遞青 危橋來處路尚帶湘瀟雨楚尾與吳頭
一生離別愁

又

劉賓王

題花曾蘸花心露當初誤結丁香樹往事小蠻窓新
愁桃葉江緩歌留薄醉急鞦人千里梅瘦月闌干
斷雲春夢寒

訴衷情

王浪洲蒼

補成團扇繡殘工並蒂瑞芙蓉花心欲就針折顏玉
唾殘茸尋斷緒怨西風寂寥中兩般時候舊月新
霜曉角昏鐘

阮郎歸

無名氏

薄羅生色盡醺醺醺醺滿架時隔池貧者燕爭泥墜

雙紅荔支 銷金字晚唐詩史紗團扇兒自遮微雨
傍花歸個情天得知

又

宋德廣

好風吹月過樓西樓前人影稀杜鵑啼斷綠楊枝行
人知不知 紅葉字斷腸詩從今懶再題後園零落
淡胭脂似君初去時

畫堂春

朱堯章

綠窓睡起小粧殘玉釵低墮雲鬟回紋衾寄見伊難
心緒闌珊 翠袖兩行珠淚畫樓十二闌干銷磨今
古霎時間恨殺青山

南鄉子

前人

花柳隔重局送過秋千笑語聲擔鵲也嗔人起晚天
晴孤負東風起踏青細細研紅綾小字相思寫不
成心上可人雲樣遠寒盟只恐恩情薄似雲

朝中措

王寧翁

玉

楊花繞畫暖風多情雪點池波戲數翠萍幾靨零星
未礙圓荷軟人天氣半如溽暑半似清和說與香
篝繡火酒痕梅却衣羅

青門怨

月痕烟景遠思孤影舊夢雲飛離魂冰冷脉脉恨滿

東風對孤鴻 翠銖塵冷香如霧人何許心逐章臺
絮夜深酒醒燭暗獨倚危樓為誰愁

少年游

胡伯雨

曉鶯聲脆雨花乾倦枕夢初殘衣漬香留窓深紙暗
把鏡近簷看 斷雲壓損溪橋柳花逗雪闌斑深倚
屏根閑敲詩字酒醒倍春寒

柳梢青

羅子遠

持潤谷

萼綠華身小桃花扇安石榴裙子野聞歌周郎顧曲
曾惱夫君 悠悠羈旅愁人似飄零青天斷雲何處
消魂初三夜月第四橋春

更漏子

全前

晚潮生涼月細一抹遠山無蒂收越棹起吳檣人間
何限忙石頭城西北角杳杳天低鶻落渾不似此
波光清歌催夕陽

又

王敬子

夢期疎書約誤腸斷夜窓風雨燈暈冷漏聲遙酒消
愁未消想天涯芳草碧人與芳春俱客憑杜宇向
江城好啼三兩聲

少年游

趙君舉

曉山日薄半春陰烟暖柳昏金滿眼新晴歌聲樵影

悠蕩碧雲心 閑庭客散人歸去疎雨濕羅襟接閣
濛濛斷虹明處十里暮雲深

採桑子

前人

春蠶昨夜眠方起閑了羅機共採柔枝柔柘陰陰三
月時 背人佯笑移金釧惆悵花期故故留遲獨自
歸來雨滿衣

一叢花令

李嶺洲

梨花隨月過中庭月色冷如銀金閨平帖陽臺路恨
酥雨不掃行雲粧褪臂閑髻慵簪卸盟海浪花沉
洞簫清吹最關情腔拍懶溫尋知音一去教誰聽再

拈起指法都生天濶鴈稀簾空鶯悄相傍又春深

江城子令

譚在菴

嫩黃初染綠初描倚春嬌索春饒燕外鶯邊想見萬
絲搖便作無情終軟美天賦與眼眉腰短長亭外
短長橋駐金鑣繫蘭橈可愛風流年紀可憐宵辦得
重來攀折後烟雨暗不辭遙

漁家傲

全前

深意纏綿歌宛轉橫波停眼燈前見最憶來時門半
掩春不暖梨花落盡成秋苑疊鼓收聲颿影亂燕
飛又趁東風軟目力漫長心力短消息斷青山一點

和烟遠

又

石瑤林

春入桃腮生嫵媚妝成日日行雲意貪聽新聲翻歌
指工尺字窓前自品瓊簫試玉碾鸞釵珠結桂金
泥絡縫乾紅袂從把畫圖誇絕世金蓮地六朝未識
雙鴛細

眼兒媚

柳

尹梅津

煥
字惟曉

裊裊垂楊蘸清漪明綠染春絲市橋繫馬旗亭沽酒
無限相思雲梳雨洗風前舞一好百般宜不知為
甚落花時節都是顰眉

霜天曉角

范石湖

晚晴風歇一夜春堪折
脉脉花疎天濬雲來去數枝
雪勝絕愁更絕此情誰共說
惟有兩行低鴈知人倚盡樓月

又

前人

少年豪縱袍錦團花鳳
曾是京城遊子馳寶馬飛金
鞍舊遊渾似夢鬢點吳霜重
多少燕情鶯意都瀉入玻璃甕

又梅

王子知深

疎明瘦直不受東皇識
留與伴春應肯千紅底
怎著

得 夜色何處笛曉寒無奈口飛入壽陽宮裏一點
點有人惜

又 梅

樓考父 梁

月澹風輕黃昏未是清吟到十分清處也不啻二三
更曉鐘天未明曉霜人未行只有城頭殘角說得
盡我平生

又 桂

趙十洲 希彭
清中

嫦娥戲劇手種長生粒寶幹婆娑千古飄芳吹滿虛
碧 韵色檀露滴人間秋第一金粟如來鏡界誰移
在小亭側

陽春白雪第八卷目錄

瑞龍吟

霓裳中序第一二

沁園春

隔浦蓮近

玲瓏四犯

燭影搖紅

解連環二

憶舊游

氏州第一

一萼紅

雨淋鈴

塞翁吟

畫錦堂

風流子三

風入松

宴清都

蘭陵王

念奴嬌二

夜飛鵲二

解語花

瑣窓寒

齊天樂二

眞珠簾

蘭陵王

祝英臺近二

鶯啼序

應天長十

滿庭芳二

繞佛閣

梅子黃時雨

魚游春水

風入松

摸魚兒

桂枝香

念奴嬌

沁園春

醉蓬萊

永遇樂

宴瑤池

西江月 四

踏莎行 二

憶秦娥

戀繡衾

南歌子 二

柳梢青

謁金門 二

長相思 三

陽春白雪卷第八

臨濮 趙 聞禮 立之選

瑞龍吟

翁時靜 元龍

清明近還是遞趙東風做成花訊芳時一刻千金半
晴半雨酬春未準鴈歸盡離字向人欲寫暗雲難認
西園猛憶逢迎翠純障面花間笑隱曲徑池連平砌
絳裙曾與濯香湔粉無奈燕幕鶯簾輕負嬌俊 青
榆巷陌踟馬紅成寸十年夢秋千弔影鞦羅塵褪事
往憑誰問畫長病酒添新恨烟冷斜陽紫山黛遠曲
曲闌干凭損柳絲萬尺不如輕鬢

霓裳中序第一

胡蒙泉

翼龍伯雨

江郊雨正歇燕子飛來人憶別未了殘梅怨結渺野
色波光春與天接相思遶潏怕柳風吹老吟髮闕情
處滿汀芳草遮莫是鷓鴣時節一餉愁絕謾料理
新翻幾闕山尊堪共誰設夢到斷橋飛絮仍雪歲華
休省閱早霜地小園花發已辨著海棠開後獨立半
廊月

又

石瑤林

憑高快醉目翠拂遙峯相對簇千丈連漪瀉谷愛浴
漾陸紅染波芬馥何人笑掬想溫泉初卸綃敷春風

蕩六宮麗質那日賜湯沐 雙浴繡鳬飄逐恍記展
江南數幅而今鬢邊漸鵲阮洞音稀懶訪仙躅繫船
橋畔宿聽靜夜泠泠奏曲長安遠渭流香膩暗憶曉
鬟綠

沁園春

春寒

徐西麓 寶之

水榭春寒梅雪漫堦竹雲墮牆數花時近也採香芳
徑舊情著處看月西窓十二樓中玉妃卧冷嬾搵
脂放海棠層隄外渺歸鴻無數江樹蒼蒼 席篋夜
禮東皇剪蔥葉為牋當綠章道杏花三月等鶯啼曉
草口萬里口鵲鳴芳九十日春三千丈髮如此愁來

白更長江南岸正柳邊無路沙雨微茫

隔浦蓮近

翁處靜

街簷揀口翠柳顚顚清明後淚蠟堆香徑一夜海棠
中酒枝上酸似豆鶯聲驟恨軟彈箏手 搵眉袖嘶
驄過盡平蕪綠襯飛繡沈紅入水漸做小蓮離藕亭
冷沈香夢似舊花瘦欲留春住時候

玲瓏四犯

同前

窗外啼鶯報數日西園花事都空繡屋專房姚魏漸
邀新寵葱翠試剪春畦羞對酒夜寒猶重誤暗期綠
架香洞月黯小階雲凍 算春將檻卸亭鞍柳成園

記人迎送蜀魂怨染巖花色泥徑紅成隴樓上半揭
畫簾料看雨玉笙寒擁怕驟晴無事消遣日長清
夢

燭影搖紅

海棠

同前

蜀錦華堂寶箏頻送花前酒妖嬈全在半開時人試
單衣後花面圓春競秀妬紅潮玉腮微透欲甦還墜
淺醉扶頭朦朧晴晝金屋名姝眼情空貯閒眉岫
世間還有此娉婷拚盡堂珠斗真豔可人消受倩鶯
催天香共袖冷烟庭院澹月梨花空教春瘦

解連環

劉藥房

晚雲粘濕正吳峯慘澹雨迷烟接早陡頓秋事分攜
甚連苑莫牆菊荒苔匝空濶愁鄉更天外怨鴻聲點
怕吟肩易瘳料理篝衣細認香摺銀缸半明半滅
念花營柳陣何日消歇可是凝黯蘭成為情潤才鬆
麗賦多悵洛浦溟濛漫佇想明璫鈎襪告梧桐夜深
略住夢時一霎

又

黃雙溪
廷珩

乍寒簾幕愁燈花正結又還輕落弄瘦影瓶裏梅梢
為誰綴隴頭向來新萼萬古今算惟有別情難託
把滿郎鬢綠盡付鴈聲幾度寥寞扁舟暮江舊泊

記鴛鴦就折烟翠猶弱漫過却歌夕吟朝問天道何時素纖重握想得文姬近更苦雲衣香薄待更闌試尋夢境夢回更惡

憶舊遊

同前

乍梅黃雨過偏倚層樓時舞垂楊暗綠知誰換似烟濃霧薄望眼偏妨昔人畫鷁無數相引入橫塘縱細切香蒲重開絳蕊懶向清觴淒涼舊遊地謾賦減蘭成才退周郎總把芳辰誤念紗窓深靜冰簟流光鳳牋試寫新句青羽碧天長又隱隱城頭隨風斷角斜照黃

氏州第一

鄭小山

開遍來禽春事過也江南倦客心苦料理花愁銷磨
酒病還是年時意緒寒淺香輕早一霎朝來微雨柳
曲聞鶯河橋信馬旋題新句漫道而今無賀鑄儘
腸斷滿簾飛絮說似風流除非小杜妙絕誇能賦黯
相逢俱有恨空流落江山好處猛拍闌干訴天知聲
聲杜宇

一萼紅

同前

憶燕臺正倚簾吹絮小立望郎來擬管調絲塗粧綰
髻密意曾記蜂媒空恁誤滿裙暗約最無奈好夢易

驚回想見而今淺顰雙翠沁破粧梅 沈帶悄然寬
盡恨年時行處紅糝蒼苔前事重尋幽歡難偶鈿合
空委鸞釵這一點相思清淚做心下煩惱幾時灰數
疊蠻牋怨歌忍對花裁

雨淋鈴

杜龍沙

窓影瓏璁畫樓平曉翳柳啼鴉門巷漸有新烟東風
定人掃桐花峭寒斗減看旅鴈爭起蒹葭遡斷雲多
少悲鳴數行又下遠汀沙 應是故園桃李謝送清
江一曲闌干下染翰為賦春羈嗟雙鬢客舍成華繡
鞭綺柏強攜酒來覓吳娃聽扇底悽惋新聲醉裏翻

念家

塞翁吟

陳行簡但之

遠碧秋痕瘦。楚玉恨賦。淒涼荷雨。碎泣殘粧。繫愁在
垂楊秋衣。拂疊仙艸。露裁雲刀尺。猶香詩錦字。獸明
璫。肯容易。相忘。思量空掩抑。分宵緩枕。終不敵涼
譙漏長。自解珮蘭皋去後。漸消滅。香梅醞藉。小杜踈
狂年華駛。水髻影。西風都付清觴。

畫錦堂

孫花翁

薄袖禁寒。輕粧媚晚。落梅庭院春妍。映戶盈盈回倩。
笑整花鈿。柳裁雲翦腰支小。鳳蟠鴉髻鬢偏東。風

裏香步翠搖藍橋那日因緣
嬋娟留惹盼渾當了
匆匆客愛深憐夢過闌干猶認冷月秋千杏梢空闌
相思眼燕翎難繫斷腸牋銀屏下爭信有人真个病
也天天

風流子

木樨

翁處靜

天潤玉屏空輕陰弄澹墨畫秋容正涼挂半蟾酒醒
窓下露催新鴈人在山中一片好秋花占了重換却
西風簫女夜歸帳棲青鳳鏡娥粧冷釵墜金蟲西
湖花深窈窕閨庭砌曾占席地歌鐘載取斷雲歸去幾
處房櫳恨小簾燈暗栗肌消瘦帶爐烟減珠袖玲瓏

三十六宮清夢遠與誰同

又

李嶺洲

雙燕立虹梁東風外烟雨濕流光望芳草雲連怕經
南浦蒲萄波漲怎博西涼空記省淺粧眉暈軟胃袖
唾痕香春滿綺羅小鶯稍蝶夜留弦索么鳳求凰

江湖飄零久頻回首無奈觸緒難忘誰信溫柔牢落
翻墮愁鄉仗玉牋銅爵花間陶寫珥金鏡月底平
章十二主家樓苑應念蕭郎

又

利碧潤

梨園花柳地扶殘醉曾記問妖嬈歎惹住輕烟柔絲

未改霏零疎雨膩粉先飄更低道花無三日艷柳有
一年嬌卷翠未遲醉紅易失共偎香影同賞良宵
如今知何處三山遠雲水一望迢迢旁砌青鸞好在
誰送歸颿但花下紅雲尚通夕照柳邊白月自落寒
潮最是無端子規啼破寒梢

風入松

同前

斷蕪幽樹際烟平山外又山青天南海北知何極年
年是匹馬孤征看盡好花成子暗驚新笋抽林歲
華情事苦相尋弱雪鬢毛侵十千斗酒悠悠醉斜河
界白日雲心孤鶴盡邊天潤清猿咽處山深

宴清都

黃雙溪

墜葉窺檐語風簾薄遞來幽恨無數牙籤倦展銀缸
細別悄然歸旅聲傳漏閣偏長更奈向瀟瀟亂雨想
近日舞袖翻雲吟牋度雪誰顧當時翠縷吹花東
城繡陌雙燕何許香羅唾碧暗晴沙印粉甚綠重覩
藍橋鎮隔芳夢念騎省悲秋漫賦待倚闌或過賓鴻
殷勤寄與

蘭陵王

同前

絮花弱吹滿斜陽院落秋千外無數小舟綠水溶溶
帶城郭流光漫暗覺辜却鶯呼無諾懽遊地都在夢

中雙蝶翩翩度簾幕 憑誰問康樂又粉過新梢紅
褪殘萼闌干休倚東風惡憐瑟韻空在鑑容偷改青
青洲渚偏杜若故交半寥寞 漂泊鎮如昨念玉指
頻彈珠淚還閣孤燈隱隱巫雲薄奈別遽無語恨深
誰託明朝何處夜漸短聽畫角

念奴嬌 菊

安晚

楚天霜曉耆老來秋圃寒花猶在金闕栽培端正色
全勝東籬風采雅韻清虛幽香淡泊惟有陶家愛由
他塵世落紅愁處如海 多少風雨飄搖夫君何素
晚節應難改休道三閭曾舊識輕把

同盟索梅為友不復嬌春態年年秋後笑觀芳草蕭
艾

又

李清照

蕭條庭院又斜風細雨重門須閉
寵柳嬌鶯寒食近
種種惱人天氣
險韻詩成扶頭酒醒別是閒滋味
飛鴻過盡萬千心事誰寄
樓上幾日寒濃
簾垂三面
閒拍闌干倚被冷香消清夢斷
不許愁人不起清露晨流
疎桐初引多少遊春意
雲高烟斂更看明日晴未

夜飛鵲

胡蒙泉

星橋度情處也久天長塵世無此匆忙纖雲淡蕩涼
蟾小家家瓜果口唐愁人獨無那歎紫簫易斷青翼
難將返魂何在漫空留荀令餘香 忍記穿針兒女
篝塵想都暗疊損衣裳誰念才情未減老來何遜少
日盧郎柳風荷露黯銷凝羅扇練囊更銀河曲曲玉
籤點點都是淒涼

又 荷花

張船窓 父

霓裳按歌地涼影參差還是珮解江湄滄波正洗機
塵恨流霞空沁鉢衣盈盈半輪笑向朱闌凝佇欲訴
心期碧筒喚酒恐嬌娥來下瑤池 未許西風吹斷

環步障千重鎮護金猊落晚文禽點鏡分香竊翠却
念幽羈綠雲驚散暗傷情不似芳時待清歌招些憐
心問的水香舟移

解語花

同前

輕雷殷殷小枕驚回簾影搖口庭戶嫩涼遙度江雲
墮結作西窓暗雨閒堦靜佇歎疎袂愁寬一縷憑畫
闌潤葉鳴條總是安秋處因喚扁舟晚渡漸聞歌
招得采菱儔侶臨平歸路花無數應識汀洲倦旅飛
紅怨莫長趁得斷鴻南浦閒枕食誰更無聊應最憐
純素

瑣窓寒

黃雙溪

駐馬林塘還尋舊迹雨收秋晚殘蕉映牖強把碧心
偷展記相逢畫堂宴開亂花影入簾初倦正小池漲
綠絲綸曾試事隨鴻遠淒斷情何限料素扇塵深
怨娥碧淺清宮麗羽漫有苔牋題滿問低牆雙柳尚
存幾時艷燭親共剪但凝眸數點遙峯春色青如染

齊天樂

同前

十年漢上東風夢依然淡烟鶯曉繫馬橋空維舟岸
易誰識當時蘇小萼花開草任波浴斜陽絮迷芳島
笑底歌邊黛娥嬌聚怕歸早京塵衣袂易染舊遊

隨霧散新恨難表燕子朱扉梨英翠箔留得春光多
少暗絲漫繞料帶角香銷扇陰詩香口倚秋千片雲
天共渺

齊天樂

庚戌元夕都下過趙立之

丁元隱默

倦雲休雨風還作交相醒花蘇柳字滿吟灰痕添坐
席羸得新愁癡守歸期未有負小院移蘭故園嘗韭
謾道春來沈腰惟覺似秋瘦燒燈時候是也楚津
留野艇曾趁芳友問口賒晴憑春買夜明月添香解
酒知別久悵帝陌論心客塵侵首戲鼓聲中舊情猶
在否

真珠簾

徐

落紅幾陣清明雨。憶花期半被晴慳。寒阻新柳著春
濃。早翠池波妬粉。雨香雲消息遠。漫舊日秋千庭宇。
凝佇正春酲。簾外一聲鶯語。塵鎖寶箏弦柱。自眉
峯惹恨。六么慵舞。深院不成粧。有淚彈誰與記得。踏
青歸去後。細共說。花陰深處。心忡怕。當時飛燕知人
分付。

蘭陵王

雨中坐
元寺閣賦

曹松山

杏花坼烟柳。藏鴉翠陌。蘇堤上人正。踏青嫩草茸茸。
相襯羅袂。遊絲挂晴塔。千里酣紅艷。白秋千外。嬌靨

笑春一片笙簫綺霞碧 阿香妬傾國把鏡口深奩
絲雨愁纖崇桃積李無顏色但蝶粉香漬燕泥芹冷
紫錢芳暈翳寶瑟悵還近寒食 岑寂恨無極更酒
驛孤烟暮院長日梨花滿地春狼籍望鳳闕波渺燕
樓雲隔凭闌干晚吟袖濕但笑拍

祝英臺近

蘇竹里

結垂楊臨廣陌分袂唱陽關穩上征鞍目極萬重山
歸鴻若到伊行丁寧須記寫一封書報平安 漸春
殘是他紅褪香收銷淚點斑枕上盟言都做夢中看
銷魂啼鵲聲中楊花飛處斜陽下愁倚闌干

又木樨

張東之滋

寶熏濃雲暝重瑞葉麗金蕊黛綠蜂黃秋態未憔悴
繡簾深院黃昏著香無處人欲睡為花重起月如
水別有天外樓臺玲瓏異塵世翠袖生寒祇欠素娥
倚何如倩取西風吹將歸去為添在廣寒宮裏

鶯啼序

徐西麓

鼎夫

荼蘼一番過雨洒殘花似雪向清曉步入東風細拾
苔砌餘靨有數片飛霑翠柳縈迴半著雙歸蝶悄無
人共立幽禽昵昵能說因念年華最苦易失對春
愁暗結歎自古曾有佳人長門深閉脩潔寄公弦千

言萬語悶滿眼欲彈難徹靠珠櫳風雨微收落花時
節春工漸老綠草連天別浦共一色但暮靄朝烟
無際盡日目極江北江南杜鵑叫裂此時此意危魂
默默渭城客舍青青樹間何人把酒來看別思量怎
向遲回獨掩青扉夕陽猶照南陌春應記得舊日
疎狂等受今磨折便永謝五湖烟艇只有吟詩曲瑤
煎茶小窓眠月春還自省把融和事長留芳晝人間
世興羈臣恨妾銷離惻自題蕙葉回春坐聽蓬壺漏
聲細咽

應天長

燕堤春晚

張梅深

梁成子

曙林帶暝晴靄弄霏鶯花未認遊客草色舊迎雕輦
蒙茸暗香陌秋千架間曉索正露洗繡鴛痕窄費人
省隔夜濃歡醒處先覺重過湧金樓畫舫紅旌催
向段橋泊又怕晚天無準東風妬芳約垂楊岸今勝
昨水院近占先春酌恁時候不道歸來香斷燈落

又 平湖秋月

候蛩探暝書鴈寄寒西風暗剪綃織報道鳳城催鑰
笙歌散無蹟冰輪駕天緯逼漸款引素娥游歷夜粧
靚獨展菱花淡綯秋色人在湧金樓漏迴繩低光
重袖香滴笑語又驚棲鵲南飛傍林闌孤山影波共

碧向此際隱迹如識夢仙遊倚遍霓裳何處聞笛

又 斷橋殘雪

麓漸近曉篙水漲漪孤山漸卷雲簇又見岸容舒臘
菱花照新沐橫斜樹香未北倩點綴數梢疎玉斷腸
處日影輕消休怨霜竹 簾上湧金樓酒灩酥融金
縷試春曲最好半殘鴉鵲登臨快心目瑤臺夢春未
足更看取酒窓填屋滿橋外柳下吟鞭歸趁遊燭

又 雷峯夕照

磬圓樹杪舟亂柳津斜陽又滿東角可是暮情堪剪
平分付烟郭西風影吹易薄認滿眼晚紅先落真惟

有塔起金輪千載如昨 誰信湧金樓此際憑闌人
共楚天約準擬換樽陪月繒空卷塵幕飛鴻倦低承
泊門倒指數來還錯笑聲裏立盡黃昏剛道秋惡

又 麴院荷風

換橋度舫添柳護隄坡仙題欠今續四面水窓如染
香波釀春麴田田處成暗綠正萬羽背風斜矗亂鷗
去不信雙鴛午睡猶熟 還記湧金樓共拊雕闌低
度浣紗曲自與故人輕別榮枯換涼燠亭亭影驚艷
目忍到手又成輕觸悄無語獨撚花鬢心事曾卜

又 花港觀魚

岸容沉錦波影隨紅纖鱗巧避鳬唼禹浪未成頭角
吞舟膽猶怯湖山外江海巾怕自有暗泉流接楚天
遠尺素無期枉誤停楫四望湧金樓帶草帶烟縹
緲際城堞漸見莫榔敲月輕舫亂如葉濠梁興歸未
愜記舊伴袖携留口指魚水總是心期休怨三疊

又南屏晚鐘

翠屏對晚烏榜占堤鐘聲又飲春色幾度半空敲月
山南應山北歡娛地空浪迹謾記省五更聞得洞天
曉夾柳橋疎穩縱香勒前度湧金樓笑傲東風鷗
鷺半相識暗數院僧歸盡長虹卧深碧花間悵猶記

憶正素手暗攜輕折夜深後不道人來燈細窓隙

又 柳浪聞鶯

翠迷倦舞紅駐老粧流鶯怕與春別過了禁園寒食
東風顫顰鐵遊人眼柔帶結更喚醒羽喉宮舌畫橋
遠不認繡蠻晚棹空歇 爭似湧金樓燕燕歸來鈎
轉莫簾揭對語畫梁消息香泥砌花屑昆明事休更
說費夢繞建章宮闕曉啼處穩繫金狨雙鐙籠月

又 三潭印月

桂輪逼采菱沼漾金潛虬暗動鮫室水路乍疑霜雪
明眸洗春色年時事還記憶對萬頃葑痕龜坼舊遊

處不認三潭此際曾識
今度湧金樓素練紫窓頻
照庾侯席自與影娥人約移舟弄空碧宵風悄簾漏
滴早未許睡魂相覓有時恨月被雲妨天也拚得

又 兩峯掉雲

暮屏翠冷秋樹赭疎雙峯對起南北好與霽天相接
浮圖現西極宮堯處雲共碧漫費盡少年遊屐故鄉
近一望空遙水斷烟隔
閒凭湧金樓漱灩波心如
洗夢淹筆喚醒睡龍蒼角盤空壯商翼西湖路成倦
客待倩寫素練千尺便歸去酒底花邊猶自看得

滿庭芳 西湖

陳月境 偕

嵐影浮春雲容容雨澄泓碧展玻璃高低樓觀窓戶
舞連漪別有輕盈水面清謳起舟葉如飛沙隄上垂
鞭信馬柳重綠交枝漸殘紅倒影金波潋灩弦筦
催歸看飄香陳粉滿路扶攜不盡湖邊風月孤山下
猿鳥須知東風裏年年此水貯盡是和非

又送春

同前

榆英拋錢桃英胎子楊花已送春歸未成萍葉水面
綠紋肥沙暖溪禽行哺忘機處雛母相隨重簾靜銅
壺晝歇聲度竹間碁人生如意少樂隨春減恨為
情離怕辜愁勾怨漸近金徽浮世更相代謝江頭明

月渡口斜暉闌情處摩挲釣石莫遣上苔衣

梅子黃時雨

張梅深

雲宿江樓愛留人夜語頻斷鐙炷奈倦情如醉黑甜
清午謗道迎薰何曾是簞紋成浪衣成雨茶甌注新
期竹院殘夢連渚應誤重簾淒佇記并刀剪翠秋
扇留句信那回輕道而今歸否十二曲闌隨意凭楚
天不放斜陽暮沈吟處池草暗喧蛙鼓

繞佛閣

張船窓

渚雲弄濕烟縷際晚江國遙碧鴻過無迹怕聞野寺
孤鐘動淒惻小橋路窄踈袖暗拂衰草愁聽蛩語還

寂可堪過了龜紗負瑤席 萼蔭露華白一夜秋牕
驚曉色柳影孤危殘輝空抱葉想搖落關情歸夢頻
折物華消歇盡倒斷寒塘幽香先滅怨紅供拒霜啼
頰

魚遊春水

青樓臨遠水樓上東風飛燕子玉鈎珠箔密密鎖紅
藏翠剪勝裁幡春日戲簇柳簪梅元夜醉閒憶舊歡
暗彈新淚 羅帕啼痕未洗愁見同心雙鳳翅長安
十日輕寒春衫未試過盡征鴻知幾許不寄蕭娘書
一紙愁腸斷也那人知未

風入松

昔年心醉杜韋娘，曾格外踈狂。綵牋預約西湖上，共
幽深竹院松窓。愁夜黛眉顰翠，惜歸羅帕分香。重
來一覺熟黃粱。空烟浪茫茫。如今眼底無姚魏，舊遊
處都是淒涼。入扇柳風殘酒，點衣花雨斜陽。

摸魚兒

朱雪厓

對西風鶻搖烟碧，參差前事流水。紫絲羅帶鴛鴦結
的的，鏡盟釵誓，渾不記。謾手織迴紋，幾度欲心碎。安
花著蒂，奈雨覆雲翻，情寬分窄。石上玉簪，脆朱樓
外，愁壓空雲欲墜。月痕猶照，無寐陰晴也只隨天意。

枉了玉銷香悴君且醉君不見長門青草春風淚一
時左計悔不蚤釵荆暮天修竹頭白倚寒翠

桂枝香

施翠岩

西風滿目漸院落悄清愁近銀燭多少蟲書墮翠又
隨波穀姮娥半露扶疎影向虛檐似知幽獨浦鴻聲
斷枝烏漏永芳夢難續記舊日離亭細囑早歸趁
香邊頻泛醺醺誰遣而今對景黛蛾雙蹙玉鞭但共
秋光遠漫空憐如許金粟露零襟冷蕭蕭更魚數竿
脩竹

念奴嬌

續雪谷

砌紅慵掃問東風應念西園寥落簾捲垂楊鶯轉巧
才見還口飛却樵指光陰關心節序總在秋千索翻
翻雙蝶傍人爭趁行樂 曾記步月歸來秦箏彈徧
共倚闌干角別後池亭誰闌草多少芳游搭閣世事
升沈人生聚散俯仰空如昨餘香猶在繡幃清曉寒
薄

沁園春

陳行簡

睡起聞鶯捲簾微雨黃昏遞愁正青翰音斷離懷幾
摺碧雲莫合十里雙眸思發花前人歸鴈後誤記歸
帆天際舟渾無據但餘香繞夢頻到西樓 風流翻

是花讐謾長遣眉山翠不流想哀箏繞指鴻移鳳咽
殘燈背泣玉沁春柔夜月精神朝陽微艷何處瑤臺
輕駐留愁無際被東風吹去綠黯芳洲

醉蓬萊

會稽蓬萊閣懷古

吳秋厓

又扁舟東下水樹青圓雨榴紅薄燕子愁多在重重
簾幕杖屨山陰而今休更問月光眉約雙杏盟寒七
香珠墜歌塵飄泊莫倚危闌怨深黃竹一鶴歸來
亂峯飛落笑色凌波任霧抽烟邈飄渺生香地冷湘
水外片雲如削昨夜離人遊仙夢遠天風吹覺

永遇樂

同前

一鴈斜陽亂蛩衰草天淨秋遠獨立西風星星鬢影
疑被渠霜染宜修何處秋深湘水隱約數峯青淺想
而今亭亭皓月共誰倚闌淒惋 瑤箱翠襲玉奩共
剪暗裏淚花偷濺一日思量十年瘦削春色回眸減
凋鸞好在文簫重許壘酒試香庭院正銷魂餘霞散
碧暮鴉數點

宴瑤池 神仙詞

同前

紫鸞飛舞又東華宴罷歸步凝碧縹緲天風吹送處
泠泠珮聲清逸青童兩兩爭笑撚琪花半折羽衣寒
露香披翠幢珠輅去雲疾 西真還又傳帝勅霞城

檢校問學仙消息玉府高寒有不老丹容自然瓊液
人間塵夢應誤認烟痕霧跡洞雲依約開時丹華飛
素白

西江月

徐桃渚 佩夫

曲折迷春院宇參差近水樓臺吹簫人去燕歸來空
有落梅香在花底三更過雨酒闌一枕驚雷明朝
飛夢隔天涯腸斷流鶯聲碎

又

翁處靜

山色低銜小苑春雲暗宿空庭秋千無月冷雙繩閒
去畫闌人靜一夜海棠如夢半窓銀燭多情好花

留不到清明日日陰晴無定

又

王花洲

往事星移物換舊游雨冷雲沈真娘墓草幾回青問
著寒潮不應何處芙蓉別館依前楊柳離亭東風
吹淚入重局為喚香魂教醒

又

胡蒙泉

水霽芹香燕背林深風暖鶯吭一春心事錦機傍忘
却尋芳模樣柳絮池塘盡午梨花院落昏黃闌干
曲曲是回腸倚到西廂月上

踏莎行

同前

合數冰蓮注情金葉臂痕猶記嗔時迹小樓幾個月
黃昏荷香柳影都知得問字燈深學書窓黑衣襟
詩卷留殘墨相思不抵藕絲長夢雲斷處吳山碧

又

照恨菱花剪情菰葉彩雲散後無蹤跡聽郎言語識
郎心當時一點誰消得柳暗花明螢飛月黑臨窓
滴淚研殘墨合歡帶上舊題詩如今化作相思碧

憶秦娥

翁處靜

三月時楊花飛盡無花飛無花飛不放春去爭得春
歸高樓望斷黃金鵲綠窓眉黛傷新離傷新離好

將別後長做歸時

戀繡衾

同前

獸爐烟重火半焦捲簾時雪意又銷過數點殘鴉外
想梅花寒在灞橋謝娘春恨深如柳未東風先道
絮飄且莫把冰絲剪有燈球紅繡未描

南歌子

胡蒙泉

山枕鶯聲曉羽觴花片飛昨朝猶道未成歸不記春
衫襟上舊題詩愁眼垂楊見苦心紅燭知翻成怕
見別離時只寄一聲將息當相思

又

續雪谷

眼媚雙波溜腰柔一搦纖問伊何事放珠簾笑道篆
香銷盡要重添數日寬金釧梳雲拂翠奩梅妝依
舊落虛檐題起一春心事兩眉尖

柳梢青

陳行簡

綠弱紅臞煖雲沁雨乍有還無破曉幽禽平渠流水
春響庭除梅酸初著花跗似滴滴新愁未紓幾信
花風一痕青燒萬里秦吳

謁金門

同前

歸未卜頻倒金瓶纖玉明月綃窓停剪燭榻愁題蠹
綠秋水娟娟魚目腰素幾分綃縮接得雲牋無意

讀離鞍何處宿

又

姚雪蓬錦

吟院靜。避日自行花影。重透水沈雲滿鼎。晚妝窺露
井。飛絮遊絲無定。誤了鶯鶯相等。欲喚海棠教睡
醒。奈何春不肯。

長相思

徐徑畝 霖

聽鶯聲。惜鶯聲。客裏鶯聲最有情。家山何處青。問
歸程。數歸程。行盡長亭又短亭。征衫脫未成。

又 題甘棧

胡蒙泉

南山鐘。北山鐘。一聽鐘聲百念空。古今昏曉中。望

秋風教秋風等得秋來等過鴻燈前書一封

又

續雪谷

心悠悠恨悠悠誰剪春山兩點愁
笙寒燕子樓曉星稀暮雲飛
織就迴文不下機
花飛人未歸

陽春白雪卷第八終

陽春白雪外集

臨濮 趙 聞禮 立之選

賀新郎 寄李伯紀 張仲宗

曳杖危樓去斗垂天滄波萬頃月流烟渚掃盡浮雲
風不定未放扁舟夜渡一鴈落寒蘆深處悵望闕河
空弔影正人間鼻息鳴鼉鼓誰伴我醉中舞 十年
一夢揚州路倚高寒愁生故國氣吞□□□□□
三尺劍遺恨琵琶舊語漫暗澹銅花塵土喚取謫仙
平章看過苔溪尚許垂綸否風浩蕩欲輕舉

又 送胡邦衡謫新州

夢繞神州路。悵西風、連營畫角。故宮離黍。底事崑崙
傾砥柱。九地黃流亂注。聚萬落、千村狐兔。天意從來
高難問。況人情、易感悲如許。更南浦、送君去。涼生
岸柳。催殘暑。耿銀河、疎星淡月。斷雲微霧。萬里家山
知何處。回首對牀夜雨。鴈不到、書成誰與。目盡青天
懷今古。肯兒曹、恩怨相爾汝。舉大白、唱金縷。

又 寄公甫

稼軒

把酒長亭說。愛淵明、風流酷似。卧龍諸葛。何處飛來
林間鵲。蹙踏松梢殘雪。要破帽、多添華髮。賸水殘山
無態度。被疎梅、料理成風月。兩三鴈也。蕭瑟。佳人

重約還輕別，悵清江、天寒不渡。水深冰合，路斷車輪生四角。此地行人銷骨，問誰使、君來愁絕。鑄就而今相思錯，料當初、費盡人間鐵。長夜笛、莫吹裂。

又

許深甫及之

舊俗傳荆楚，正江城、梅炎藻夏。做成重午，門艾釵符闕何事，付與癡兒騃女。耳不聽、湖邊鼙鼓，獨炷爐香薰衣潤。對瀟瀟、翠竹都忘暑。時展卷、誦騷語。新愁不障西山雨。問樓頭、登臨倦客，有誰懷古。回首獨醒人何在，空把清尊酹與漲不到、瀟湘江渚。我又相將湖南去。已安排、吊屈嘲漁父。君有語，但分付。

又

六月十五日夜西湖月下

史邦卿

同住西山下是天地中間愛酒能詩之杜船向西陵
佳處放塵世必無知者暑不到雪宮風榭楚竹忽然
呼月上被東南幾葉雲紫惹雲散去笑聲罷清尊
莫為嬋娟瀉為狂吟醉舞無失晉人風雅踏碎橋邊
楊柳影不聽漁樵閑話便欲舉空杯相謝北斗以南
如此幾想吾曹便是神仙也問今夜是何夜

又

吳中韓氏滄浪
亭和吳夢窓韵

吳履齋

撲盡征衫氣小夷猶尊疊杖屨踏開花事邂逅山翁
行樂處何似烏衣舊里歎荒草舞臺歌地百歲光陰

如夢斷算古今興廢都如此何用洒兒曹淚 江南
自有漁樵隊想家山猿愁鶴怨問人歸未寄語寒梅
休放盡留取三花兩葉待老子領些春意皎皎風流
心自許儘何妨瘦影橫斜水煩翠羽伴醒醉

又 雪堂弔東坡

宋謙甫

喚起東坡老問雪堂幾番興廢斜陽衰草一月有錢
三十塊何苦抽身不早又底用北門攜藻儋兩蠻烟
添老色和陶詩翻被淵明惱畢竟是忘言好 周郎
英發人間少漫依然烏鵲南飛山高月小歲月堂堂
留不住此世何時是了算不滿英雄一笑我有豐淮

千斗酒把新愁舊恨都傾倒醉吹笛到天曉

滿江紅

稼軒

笳鼓歸來舉鞭問何如諸葛人盡道恁恁五月渡瀘
深入白羽風生貔虎嘯青溪路斷猩羆泣早紅塵一
騎落平岡捷書急三萬卷龍頭客渾未得文章刀
把詩書馬上笑驅鋒鏑金印明年如斗大貂蟬却自
兜鍪出待勒公勲業上磨崖浯溪石

又

劉後村

金甲瑠戈記當日轅門初立磨盾鼻一搗千紙龍蛇
猶濕鏤馬曉嘶營壁冷樓船夜渡風濤急有誰憐猿

臂故將軍無功級 平戎策從軍什零落盡慵收拾
把茶經香傳時時溫習生怕客談榆塞事且教兒誦
花間集歎臣之壯也不如人今何及

又

王東卿

八十歸來方畧下幾竿脩竹柴門外沙鋪軟路水流
清王栽接新來桃與李安排舊日松和菊過小橋作
箇看山樓千峯綠 收筆硯藏碁局酒莫飲經須讀
但平平放下頓超凡俗獨睡已無年少夢閑吟不唱
他家曲算人生萬事苦無多相將足

又 送李御帶珙

吳履齋

紅玉階前問何事
翩然引去湖海上一汀鷗鷺半帆
烟雨報國無門空自怨
濟時有策從誰吐
過岳虹亭下繫扁舟
鱸堪煮拚一醉留君住
歌一曲送君路
遍江南江北欲歸何處
世事悠悠渾未了
年光冉冉今如許
試舉頭一笑問青天
天無語

又赤壁懷古

戴式之

赤壁磯頭一番過
一番懷古想當時
周郎年少氣吞區宇
萬騎臨江
貔虎噪千艘
列炬魚龍怒
卷長波
一鼓因曹瞞
今如許
江上渡江邊
路形勝地興亡處
覽遺踪
勝讀史書
言語幾度東風吹
世換千年往事

隨潮去問道傍楊柳為誰春搖金縷

又

潘紫崑

物庭堅

茶室依崖春風送一簾山色沙鳥外漁樵而已別無
閑客醉後和衣眠憤背醒來淪茗尋泉脉把心情分
付隴頭雲溪邊石身未老頭先白人不見山空碧
約釣竿共把自慚鉤直相蜀吞吳成底事何如只抱
隆中膝漫長歌罷悄無言看青壁

又

脩視江興水
備舟中賦

陳可齋

萬里長江天與限東南吳楚何人者提英口口指鞭
欲渡孟德舳艫煙赤壁口口口口口口問波濤說

盡幾英雄今猶古 中原地紛□□□□□□□□

□□□□□□□□□□□□□□□□□□□□□□

□□□□□□□□□□□□□□□□□□□□□□

□□□□□□□□□□□□□□□□□□□□□□

又 和陳漕使仙湖韵

蕭大山

莫是西湖分一派殘波賸碧閑問著鶯仙丹事老榕
知得符水帶長鷗踏損柳風絮暖魚吞入只前山依
舊漢時青睛還濕 亭疎好何消密花少好無多植
聽黃鸝三請要詩翁出消渴泉斟寒玉液留題石剝
蒼苔色歎而今翻羨口南春乾坤窄

又烏衣園作

吳履齋

柳帶榆錢又還過清明寒食天一笑滿園羅綺滿城
簫笛花樹得晴紅欲染遠山過雨青如滴問江南池
館有誰來江南客烏衣巷今猶昔烏衣事今難覓
但年年燕子晚烟斜日料撒一春塵土債悲涼萬古
英雄迹且芳尊隨分趁芳時休虛擲

又

泛舟武夷千秋仙
游館次呂居仁韵

留雲麓 元剛

風送清篙沿流汴武夷九曲回首處虹橋無復慢亭
遺屋翠壁雲屏臨釣石銀河雪瀑飛寒玉想當年鐵
笛倚林吹秋空綠褰苻帶捲筇竹披荷芰餐椒菊

問丹崖碧嶺底堪重辱青笈不妨娛老眼烏髯未許
污吾足恰仙游一枕夢醒來胡麻熟

念奴嬌

程滄洲

中秋玩月 山谷共倒金荷家萬里難
得尊前相屬之句悵然有懷借韵作一
首

晚涼散策恨西風不貸一池殘綠誰與冰輪撈玉斧
恰好今宵圓足樹杪翻光莎庭轉影零亂崑崙玉盞
曾清露閒須澆下醺醺 休問湖海飄零老人心事
似倚巖枯木萬里親知應健否脉脉此情誰屬世慮

難平天高難問倚遍闌干曲不妨隨寓買園惟種松竹

小梅花

賀方回

城下路淒風露今人犁田昔人墓岸頭沙帶蒹葭漫漫昔時流水今人家黃埃赤日長安道倦客無漿馬無草開函關掩函關千古如何不見一人閑六國擾三秦掃初謂商山遺四老馳單車致緘書裂荷焚芟接武曳長裾高人端得酒中趣深入醉鄉安穩處生忘形死忘名誰論二豪却不數劉伶

又

同前

縛虎手懸河口車如鷄栖馬如狗白綸巾撲黃塵不
知我輩不是蓬蒿人衰蘭送客咸陽道天若有情天
亦老作雷顛不論錢誰問旗亭美酒斗十千酌大
斗起為壽青鬢常青古無有笑嫣然舞翩然當壚秦
女十五語如弦遺音能記秋風曲事去千年猶恨促
攬流光繫扶桑爭奈愁來一日即為長

又

思前別記時節美人顏色如花發美人歸天一涯娟
娟姮娥三五滿還虧翠眉蟬鬢生離訣遙望青樓心
欲絕夢中尋卧巫雲覺來珠淚滴向湘水深愁無

已奏綠綺歷歷高山與流水妙通神絕知音不知暮
雨朝雲何山岑相思無計堪相比珠箔雕闌幾千里
漏將分月窓明一夜梅花忽開疑是君

右三闋彙括唐人詩歌為之是亦集句之
義然其間語意聯屬飄飄然有豪縱高舉
之氣酒酣耳熱浩歌數過亦一快也

沁園春 寄稼軒

劉改之

斗酒藏肩風雨渡江豈不快哉被香山居士約林和
靖與蘇公命駕勒吾回坡謂西湖正如西子濃抹淡
粧臨照臺二公者都掉頭不顧只筦銜杯 白云天

竺去來圖盡裏呼噪樓觀開者東西一澗縱橫水遠
兩山南北高下雲堆通曰不然暗香疎影且向孤山
先探梅頃晴去訪稼軒未晚且此徘徊

又 仰聞上郭帥

玉帶猩袍遙望翠華馬去似龍擁貂蟬爭出千官鱗
集絳綵不斷萬騎雲從細柳營開團花袍窄人指汾
陽郭令公山西將笄韜鈴有種五世元戎 旌旗蔽
滿寒空魚陣整從容虎帳中想刀明似雪縱橫脫鞘
箭飛如雨霹靂鳴弓□□□□□□□□□□慘淡塵沙
飛北風中興事看君王神武駕馭英雄

又夢方孚若

劉後村

何處相逢登寶釵樓訪銅雀臺命廚人斫就東溟鯨
鱠圍人呈罷西極龍媒天下英雄使君與操餘子誰
堪共酒杯車千兩載燕南趙北劍客奇才酒酣畫
鼓如雷又爭信鄰鷄輕喚回數年光過盡功名未立
書生老去機會方來使李將軍遇高皇帝萬戶侯何
足道哉披衣起但淒涼念舊感慨興衰

又官滿作

雷春伯

問訊故園今如之何還勝昔無想舊耘蘭蕙依然葱
蒨新栽楊柳亦已扶疎韭本千畦芋根一畝雨老烟

荒誰為鉏難忘者是竹吾愛甚梅汝知乎 茅亭低
壓平湖有狎鷺馴鷗尚可呼把絳紗準擬新官到也
寒氈收拾賤子歸幾略整柴門更芟草徑惟有幽人
解枉車丁寧著與做漆碁局砌換茶壺

又用履齋多景樓韵

程滄洲

萬里飄萍送江入海過古潤州正羈懷無奈憑高縱
覽濛濛烟雨簇簇漁舟南北區分江山形勝憂憤令
人扶上樓沈凝久任斜飛雪片急洒貂裘 英風追
想孫劉似黑白兩奩碁未收把烟霞饒與坡仙米老
丹青難覓摩詰營邱斗野號風海門殘照長與人間

莞領愁憑誰問借天河一挽洗甲兵休

水龍吟 荅沈莊可

蕭鶴皋

人生何必求名身閑便是名高處卧雲衣袂何因自
染脩塗塵土世路羊腸人情狙賦翻雲覆雨把從前
舊夢倚闌重省休更錯添牋注 况是吾廬江上也
抵得封侯千戶高眠閑聽隣舟漁唱倚闌農語休望
當年溪邊俱載隆中三顧怕羣鷗微覺見人欲起背
人飛去

水調歌頭

甄龍友

西風新葉墮南國九秋初周天三百六十五度片雲

無上有迢迢河漢下有滔滔江水橫載洞庭湖一葉
放流去人在渾儀圖滿虛空張寶蓋綴明珠琉璃
為地游戲乾象駕坤輿爛醉蓬萊方丈遍入華嚴法
界試問夜何如北斗轉魁柄東海欲飛鳥

又送陳之歸鎮州

蔡伯堅

東垣步秋水幾曲冷玻璃沙鷗一點晴雪知我老忘
機共約經營五畝臥看西山烟雨窓戶舞連漪雅志
易華髮歲晚羨君歸月邊梅湖底石入新詩飄然
東晉奇韵此道賞音稀我有一峯明秀尚戀三升春
酒辜負綠蓑衣為寫倦游興說與水雲知

又寄浩然

雲間貴公子玉骨秀橫秋十年流落冰雪香藹紫貂
裘燈火春城咫尺曉夢梅花消息蠟紙寫銀鈎老星
黃塵眼如對白蘋洲世間物唯有酒可忘憂蕭閑
一段歸計佳處著君侯翠竹江村月上但要綸巾鶴
氅來往亦風流醉墨薔薇露洒遍酒家樓

又

榮樵仲

既難求富貴何處沒溪山不成天也不容我去樂清
閑短褐寬裁疎葛柱杖橫拖瘦玉著个竹皮冠弄影
碧霞裏長嘯翠微間醉時歌狂時舞困時眠翛然

自得了無一點俗相干擬把清風明月剪作長篇短
闌留與世人看待倩月邊女歸去借青鸞

水調歌頭

帥蜀作

崔菊坡

與之
正予

萬里雲間成立馬斂門關亂山極目無際直北是長
安人苦百年塗炭鬼哭三邊鋒鏑天道久應還手寫
留屯奏炯炯寸心丹對青燈搔白首漏聲殘老來
勲業未就妨却一身閑蒲澗清泉白石梅嶺綠陰青
子怪我舊盟寒烽火平安夜歸夢繞家山

又和吳秀巖韵

程滄洲

馳褐倚禪榻絲鬢飈茶烟誰知老子方寸歷歷著千

年試問汗青餘幾一笑腰黃榮夢我自樂天全出處
兩無累贏得日高眠八千里西望眼斷霞邊并蒼
苔碧隨分風月不論錢執手還成輕別何日歸來投
社玉海得同編經世付時傑覓个釣魚船

又

不能煩惱得掉臂便歸休前度風檣這回潦轍幾悠
悠幸得有雲一谷更自有書萬卷著甚麼來由月采
混魚目霜縈澆蠅頭相山中侯醉境將詩流情知
薄命个樣勲業也須收辟邏世間萬事推放那邊一
壁百尺卧高樓日月草頭露天地水中漚

又飲蕪湖雄觀亭

魏句濱 庭玉

壁月掛銀漢冷侵一江秋天公付我清賞仙籍桂香
浮極目江山如畫際晚雲烟凝紫秋色豁羈愁領首
上雄觀波影動簾鉤鴈排空漁唱晚楚天幽湖陰
一曲千載成敗情誰籌試問謫仙何處喚起于湖同
醉小為作遨頭老子欲起舞擺脫利名休

賀新涼

送上官尉罷官歸吳中

趙虛齋

滿酌蓬萊酒最苦是中年作惡送人時候一夜朔風
吹石裂驚得梅花也瘦更衣袂嚴霜寒透卷起潮江
高似屋甚扁舟泊在三江口明月冷載歸否分攜

欲折無垂柳但重樓倚徙兩眉重皺浪濶天高無處
問萬事不堪回首况望斷孤鴻歸後玉樣尊絲今正
美想李鷹已自先招手須破戒飲一斗

又

送靈山馮可久通守潯陽

陸象澤

象一作東

笛喚春風起向湖邊臘前折柳問君何意孤負梅花
立晴晝一舸淒涼雪底但小閣琴棋而已佳客清朝
留不住為匡廬只在家窓裏湓浦去兩程耳 草堂
舊日談經地更從容南山北水庾樓重倚萬卷心胸
幾千古仰首駸駸紫氣正江上風寒如此且趁霜天
鱸魚好把貂裘換酒長安市明夜去月千里

又贈送行諸客

魏句濱 庭玉

暮雨初收霽凭闌干一江新綠遠山凝翠漠漠春陰
添客思悵望天涯無際又猛省平生行止楚尾吳頭
多少恨付吟邊醉裏消磨矣浮世事只如此陽關
三疊徒勞耳也何須琵琶江上掩青衫淚一斗百篇
乘逸興要借青天為紙兒輩詫龍蛇飛起今夜月明
呼酒處待明朝酒醒帆千里且為我唱新製

又用俞國賢韵

洪平齋

誰識昂昂鶴且隨綠刺水殘山東村西落世事幾番
新局面省底却高三著况轉首西山日薄雪意壓檐

梅索笑任柄長柄短隣家杓竊小窺動孤酌 見花
憶得年時昨正微醺獨步黃昏被花迷却冷月吹香
春弄影么鳳梢頭先覺恍夢斷羅浮山脚欲寄心期
無驛使想凌寒不奈腰肢約空凭暖畫闌角

玲瓏四犯

被名賦茶蘼

曹松山

一架幽芳自過了梅花獨占清絕露葉擅心香滿萬
條晴雪肌素淨洗鉛華似美玉乍離瑤闕看翠蛟白
鳳飛舞不筦暮烟啼鳩 酒中風格天然別記唐宮
賜樽芳列玉筴喚得餘春住猶醉迷飛蝶天氣乍雨
乍晴長是伴牡丹時節夜散瓊樓宴金鋪深掩一庭

香月

惜餘妍

被召賦二色木香

同前

同根異色看鏤玉雕檀芳艷如簇秀葉玲瓏嫩條下
垂脩綠禁華深鎖清妍香滿架風梳露浴輕盈便似
覺醺醺格調粗俗蜂黃間塗蝶粉疑舊日二喬各
樣粧束費却春工闌合靚芳穠馥翠華臨檻清賞飛
鳳竿休辭醉玉晴晝鎖貯春瑤臺金屋

宴山亭

被召賦玉繡球

同前

香月玲瓏柔風鏤刻嫩綠枝頭圓膩飛梭艷字絮柳
池塘獨立萬紅塵外戲舞千團訝粉羽留連春媚非

是看滾雪拋瓊鏡鸞相倚 唐昌仙觀風流有霞洞
藏花紺鬢玉蕊雕闌占賞禁苑承恩難比太平瑤卉
遍揀金瓶更移近寶猊烟翠堪愛只少箇鴛鴦繡帶

桂枝香

過溧水感羊角哀左伯桃遺事

鞠花翁

丁丁起處在縱收九京經燒殘樹時見烏鳶飢噪鵲
鷗妖呼數椽老屋團荒堵算何人辦香來炷淡烟斜
照閑花野棠杳杳年度 世事幾番雲覆雨獨此道
嫌人拋棄塵土眼裏長青誰也解如山否三三五五
騎牛伴望前村吹笛歸去柳青梨白春濃月淡蹋歌
椎鼓

沁園春 夜登白鷺亭

施翠崑

披紫菟裘上白鷺亭者吹洞簫望長庚鯨過江橫素
練回仙鶴度月在青霄依約淮山清冷風露如到瀛
洲聽海濤浮圖近更玉鈴金鐸初奏琅璈 人間夢
境寥寥問故國繁華能幾朝有千年枯井龍沈鳳怨
數邱黃壤兔走猿嗥莫問榮華不如歸去短棹孤蓬
乘夜潮翠岩下耕白雲二頃賸種仙苗

水調歌頭

甲辰皖山寄
治中秋招客

鄭雲巖

甫營亭子小花柳新新栽衰翁餘暇何妨領客少徘徊
堪歎人生離合恰似燕鴻來往光景暗中催蘆荻

晚風起明月滿沙堤 去年秋如此夜有誰陪欲挽
天河無路滿眼總塵埃未了癡兒官事行止從來難
定又起到蘇臺不作別離句共醉十分盃

陽春白雪外集終